

Erich Bolinius

Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 12.4.2012 18.05 Uhr auf 94.0 bzw. 87,7)**

Leev Toehörers,
ennelk kann ik na seß Week weer maal ´n Bericht van ´n Spöl van de 1. Mannskupp van Kickers Emden geven. Dat Kickers ok mit de heel un dall neei toesamenstellte Mannskupp ok in de Oberliga Neddersassen mithollen kann, hebben se lesd Sönndag in Ottersberg wesen. Se hebben dat Spöl mit 1:0 wunnen. Ik bün ehrelk, dormit harr ik noit rekend. Umso mehr hebb ik mi freeit, as ik dorvan hört hebb. Ja, man mutt vör Trainer **Uwe Groothuis** un **Karsten Golnik** al de Hoed trecken, dat se in de lesd Weken so goed mit de Mannskupp arbeitet hebben. Un man mutt sük vörstellen: As dat in de Kickerspölen noch um Punkten gung, as Kickers also noch neet insolvent was, hett Kickers dat Spöl in Emden mit 1:3 verloren. Man Sönndag stunn de Achtermannskupp. Cheftrainer Uwe Groothuis harr sien Jung **Rouven** un **Arne Janssen** in de Binnenveteidigung upstellt. Un **Manuel Menzel** as linke un **Raphael Jakobs** as rechte Butenveteidiger leten nix anbrannen.

In de eerst Halvtied spölte Kickers mit de doch recht stark Wind un harr stückofwat goed Konterkansen. In Middelfeld harren de Trainers **Christopher Appeldorn** un de van A-Jögd utgelehnte Spöler **Ayaovie Bamezon** upstellt. Mit dorbi was ok noch de A-Jögdspöler **Marco Boerchers**. Beid Spölers harren ok al een Dag vörher in A-Jögd spölt un tegen de Heeseler SV mit 1:0 wunnen. Dat Tor in dat Spöl skoot Bamezon al in de 6 Menüte. De A-Jögd-Mannskupp hört dormit weer toe de Spitzenteams van de Neddersassenliga.

Man nu toerügg toe de 1. Mannskupp van Kickers Emden. Kickers dee sük stur, tegen de goed stahnde Ottersberger. De Japaner **Kenta Ota** was Kickers eentigste Spitze. Dorachter harren de Trainers **Bernd Grotlüschen** stellt, de dor sük as Spölmaker uttekend dee. Boerches spölte up de rechte un **Tizian Goudschal** up de linke Flögel.

Na de Pausentee kwamm Kickers beter in ´t Spöl. Dann dat Tor för Kickers: Goudschaal brengt ´n Ecke rin, de Ottersbergers könt neet klären. Dat giff ´n Gewöhl vör dat Tor. Kento Ota kummt an de Ball un haut hum in ´t Tor.
Dorna hungen de Spölers as Kletten annanner, so freiten se sük. Hör was dat egaal, dat dat in dit Spöl ansük um nix anners gung as up de Ehre. Ok de dartig Kickersfans freiten sük bannig. De een of anner harr wall ´n bietje toe völ Beer drunken, so as man later in de Bladen lesen kunn. Of dat all stimmt, wat dor schreven word, kann ik neet beurdeelen. Dat sölen anner maken.
Wat sallt, Kickers Emden hett wunnen un dormit bewesen, dat man as Mannskupp un Vereen noch neet unnergahn is. Un dat is för heel Emden wunnerbaar, meen ik. So kann ´t wiedergahn,

So, nu as alltied noch ´n kört Foetballwitz.
Präsident van ´n Bundesligamannskupp toe sien Trainer: „Wo was de neei Spöler bi de Proovtraining?“ –
„Klasse, de dee een Sönndagsskoet na de anner maken.“
„Un worum hebben se hum weer wegstürt?“
„Wi spölen doch immer saterdags!“

So, leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.